



|  |                    |                               |                               |   |  |                     |  |
|--|--------------------|-------------------------------|-------------------------------|---|--|---------------------|--|
| Pranuar / Dostizmat<br>Punëson/Pradato<br>Received/Delivered |                    | 21.02.2022                    |                               | 2 |  | viti<br>god<br>year |  |
| Organ / Injesta<br>Organ / Jedinstvo<br>Org / Unit           | Pr Prot<br>Prot No | Shtojca<br>Prilog<br>Appendix | Sasia<br>Kolicina<br>Quantity |   |  |                     |  |
| SKDMSHKK   | 903/2022           |                               | 115                           |   |  |                     |  |



## Republika e Kosovës Republika Kosova-Republic of Kosovo

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS  
NEZAVISNI NADZORNI ODBOR CIVILNE SLUŽBE KOSOVA  
INDEPENDENT OVERSIGHT BOARD FOR THE CIVIL SERVICE OF KOSOVA

A.nr.08/2022

Këshilli i Pavarur Mbikëqyrës për Shërbimin Civil të Kosovës – Kolegji për Shqyrtimin dhe Vendosjen e Ankesave në përbërje nga: Jeton Koca-kryetar, Ardita Haxhnikaj-Demi dhe Arben Mehmeti, anëtarë, me Valentina Kaçandolli Bekteshi-Zyrtare e Lartë për Bashkëpunim Profesional, në cilësinë e procesmbajtëses, ka shqyrtuar ankesën me numër A.nr.08/2022 të datës 06.01.2022 të parashtruar nga ankuesi me adresë banimi:

kundër organit të punësimit Shërbimi Korrektues i Kosovës, në çështjen juridike "*kundër anulimit të konkursit*" duke vepruar në pajtim me nenin 6 paragrafin 1 nën paragrafin 1.1 dhe nenin 18 paragrafin 1 nën paragrafin 1.2 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës dhe Rregulloren Nr.02/2018 për Procedurën e Shqyrtimit dhe Vendosijes së Ankesave në Këshillin e Pavarur Mbikëqyrës për Shërbimin Civil të Kosovës, në seancën për këshillim dhe votim të mbajtur me datë 21.02.2022, mori këtë:

### V E N D I M

I. Aprovohet si e bazuar ankesa me numër A.nr.08/2022 e datës 06.01.2022, e parashtruar nga ankuesi

II. Shfuqizohet Vendimi me numër të protokollit 1527 i datës 23.12.2021 i Zëvendësuesit të Drejtorit të Përgjithshëm të Shërbimit Korrektues të Kosovës.

III. Obligohet Drejtori i Përgjithshëm i Shërbimit Korrektues të Kosovës, që në afat prej pesëmbëdhjetë (15) ditësh nga dita e pranimit të këtij vendimi t'i ndërmerr të gjitha veprimet e duhura ligjore për vazhdimin e procedurës së rekrutimit të shpallur me datë 11.11.2021, për vendin e punës *Zyrtar Ligjor 1*, me numër reference RN00007759.

IV. Këshilli i Pavarur Mbikëqyrës për Shërbimin Civil të Kosovës, duhet të njoftohet me shkrim pas ndërmarrjes së veprimeve në pajtim me këtë vendim.

### A r s y e t i m

Ankuesi i punësuar në Shërbimin Korrektues të Kosovës (SHKK), me datë 06.01.2022 ka parashtruar ankesën me numër të protokollit 24/2022 të regjistruar me numër



A.nr.08/2022 në Këshillin e Pavarur Mbikëqyrës për Shërbimin Civil të Kosovës, kundër Vendimit me numër të protokollit 1527 të datës 23.12.2021 të Zëvendësuesit të Drejtorit të Përgjithshëm të Shërbimit Korrektues të Kosovës, përmes të cilit është anuluar procedura e rekrutimit për pozitën e punës *Zyrtar Ligjor 1*.

Këshilli i Pavarur Mbikëqyrës për Shërbimin Civil të Kosovës, bazuar në dispozitat e Rregullores Nr.02/2018 për Procedurën e Shqyrtimit dhe Vendosjes së Ankesave, me datë 14.01.2022 ka proceduar kërkesën për përgjigje në ankesë në Shërbimin Korrektues të Kosovës. Ndërsa me datë 27.01.2022 ka pranuar përgjigjen në ankesë së bashku me shkresat e bashkangjitura të lëndës.

*Kolegji për Shqyrtimin dhe Vendosjen e Ankesave, ka administruar këto prova:* Ankesën ankesën me numër të protokollit 24/2022 të regjistruar me numër A.nr.08/2022 në Këshillin e Pavarur Mbikëqyrës për Shërbimin Civil të Kosovës; Vendimi i datës 23.12.2021 i Zëvendës Drejtorit të Përgjithshëm të Shërbimit Korrektues të Kosovës; Njoftimi i datës 24.11.2021; Konkursi i datës 27.10.2021; Informata e aplikacionit me numër të referencës RN00007759; Lista e Aplikantëve; Kërkesa për Fillimin e Rekrutimit (Punësimit) e datës 07.10.2021; Kërkesa për aprovimin e buxhetit e datës 15.10.2021; Vendim i datës 06.12.2021 për emërimin e komisionit përzgjedhës; Diploma e e datës 24.07.2013 e lëshuar nga Universiteti i Prishtinës "Hasan Prishtina"; Certifikata e datës 12.10-14.10.2021, 23.09.2021, 16.09-17.09.2021, 28.04.2021, 25.04.2021, 02-06.09.2019, 09.03.2020, 23.10.2018, 20.03.2017, 06.03.2017-09.03.2017, 3-4-2017, Kontratë pune për kohë të caktuar për Rekomandimi për përtretje të kontratës për e datës 03.09.2018; Kopja e letër njoftimit e Formulari për vlerësimin e rezultateve të punës për vitin 2020 dhe 2019 për Vërtetim i datës 16.11.2021 për Vendim i datës 23.08.2018 për formimin e grupit punues; Vendimi i datës 14.02.2019 për formim të grupit punues; Vendimi i datës 28.07.2020; Certifikata e notave për Diploma e datës 13.11.2019 e lëshuar nga Kolegji ISPE për mbarimin e Programit Juridik; Diplomë e datës 13.06.2005 për kryerjen e shkollës së mesme për Certifikata e datës 15.03-16.04.2021, 13.04.2018, 13.10.2017, 12-13.03.2018, 12.08-25.10.2013, 17-19.05.2017; Lëvdatë për e vitit 2020; Mirënjohje për e datës 2019, 28.12.2016; Kontratë për themelimin e marrëdhënies së punës e datës 01.01.2012 për Kontratë pune për kohë të pa caktuar e Vendim i datës 30.05.2014 për Referencë e datës 12.11.2021 për Kopja e letër njoftimit për Formulari i vlerësimit i rezultateve në punës për Stafin korrektues për vitin 2020 dhe 2019; Vërtetimi i datës 16.11.2021 për Diploma e e datës 09.11.2009 e lëshuar nga Universiteti i Prishtinës Fakulteti Juridik; Dëshmi mbi përvojën e punës për Akt emërimi i datës 04.12.2017 për Kopja e letër njoftimit për Vlerësimi i rezultateve në punë për vitin 2020; Vlerësimi i punës provuese, Vërtetim i datës 18.11.2021 për Vendim i datës 07.10.2021 për themelimin e grupit punues si dhe përgjigja në ankesë nga organi i punësimit me shkresat e bashkangjitura të lëndës.

Kolegji për Shqyrtimin dhe Vendosjen e ankesave pasi ka shqyrtuar dhe analizuar shkresat e lëndës të parashtruara nga palët, konstatoi se ankesa e ankuesit është e bazuar sepse:

Kolegji, bazuar në shkresat e lëndës ka gjetur se Zëvendësuesi i Drejtorit të Përgjithshëm të Shërbimit Korrektues të Kosovës, në cilësinë e udhëheqësit me të lartë administrativ, me datë



08.10.2021 ka nënshkruar kërkesën për fillimin e rekrutimit për pozitën e punës *Zyrtar Ligjor*, ndërsa, Njësia për Burime Njerëzore, me datë 11.11.2021, ka shpallur konkursin për lëvizje brenda kategorisë me numër reference RN00007759 për pozitën përkatëse të punës në Shërbimin Korrektues të Kosovës/Burgu i Sigurisë së Lartë, i cili konkurs ka qenë i hapur deri më datën 18.11.2021 e që ky veprim ka qenë në pajtim me dispozitat e nenit 42 paragrafit 2 të Rregullores (QRK) Nr.16/2020 për Pranimin dhe Karrierën në Shërbimin Civil të Republikës së Kosovës, ku është përcaktuar se: *Fillimi i një procedurë për lëvizjen brenda kategorisë, është i mundur vetëm pas miratimit nga udhëheqësi në lartë administrativ i institucionit.*

Sipas konkursit me numër reference RN00007759 i shpallur me datë 11.11.2021, për vendin e punës *Zyrtar Ligjor 1* në Shërbimin Korrektues të Kosovës/Burgu i Sigurisë së Lartë, si kërkesa të përgjithshme formale janë përcaktuar si vijon:

- *Arsimi i kërkuar: Diplomë/a të studimeve universitare me të paktën 180 kredi/ECTS apo ekuivalente me to, drejtimi Juridik;*
- *Përvoja e punës e kërkuar: dy vite përvojë pune.*

Ankuesi, për këtë pozitë të punës, ka aplikuar me datë 12.11.2021 me numër aplikacioni RAN0001349, ndërsa me datë 24.11.2021 është publikuar njoftimi se tre (3) kandidatët që kanë aplikuar në procedurën e rekrutimit i kanë plotësuar kushtet e përgjithshme dhe të veçanta për lëvizje brenda kategorisë, veprim ky në pajtim me dispozitat e nenit 45 paragrafit 4 të Rregullores (QRK) Nr.16/2020 për Pranimin dhe Karrierën në Shërbimin Civil të Republikës së Kosovës, ku përcaktohet se: *Kandidatët që plotësojnë kushtet për lëvizje brenda kategorisë dhe kërkesat e veçanta për pozitën e lirë renditjes në një listë të shkurtër në rendin alfabetik. Lista e shkurtër shpallet në pajtim me nenin 9 të kësaj Rregulloreje, jo më vonë se shtatë (7) ditë kalendarike nga data e mbylljes së pranimit të aplikimeve.*

Zëvendësuesi i Drejtorit të Përgjithshëm të Shërbimit Korrektues të Kosovës, me datë 06.12.2021 ka nxjerr Vendimin me numër të protokollit 1336 me të cilin ka emëruar Komisionin Vlerësues për zhvillimin e procedurës së rekrutimit, gjegjësisht lëvizjes brenda kategorisë për pozitën e punës *Zyrtar Ligjor 1* (një pozitë) në Burgun e Sigurisë së Lartë, në pajtim me dispozitat e nenit 46 paragrafit 1 të Rregullores (QRK) Nr.16/2020 për Pranimin dhe Karrierën në Shërbimin Civil të Republikës së Kosovës, ku përcaktohet se: *Çdo institucion themelon Komisionin e vlerësimit për lëvizjen brenda kategorisë (në tekstin e mëtejme "KVLBK").*

Kolegji, po ashtu duke iu referuar shkresave të lëndës të dorëzuara nga ankuesi, gjegjësisht të dhënave të datës 20.12.2021 në Sistemin Informativ për Menaxhimin e Burimeve Njerëzore (SIMBNJ), ka gjetur se ankuesi ka përfunduar vlerësimin e intervistës me sukses.

Me datë 23.12.2021, Zëvendësuesi i Drejtorit të Përgjithshëm të Shërbimit Korrektues të Kosovës, përmes Vendimit me numër të referencës 1527 ka anuluar procedurën për lëvizje në kategori me numër reference RN00007759 për pozitën e punës *Zyrtar Ligjor 1*, në Burgun e Sigurisë së Lartë, me arsyetimin se institucioni është në fazën e hartimit të Rregullores për Organizimin e Brendshëm. Kundër vendimit për anulimin e kësaj procedure, me datë 06.01.2022 ankuesi ka parashtruar ankesë në Këshillin e Pavarur Mbikëqyrës për Shërbimin Civil të Kosovës, me pretendim ankimor se Vendimi me numër të referencës 1527 për anulimin e procedurës për lëvizje në kategori, për pozitën e punës *Zyrtar Ligjor 1* me numër reference RN00007759 është në kundërshtim me dispozitat e Ligjit Nr.06/L-114 për Zyrtarët Publikë si dhe Rregulloren (QRK) Nr.16/2020 për Pranimin dhe Karrierën në Shërbimin Civil të



Republikës së Kosovës, dhe i njëjti ka kërkuar që të vazhdohet me proces të rekrutimit për shpalljen e kandidatit fitues.

Kolegji për Shqyrtimin dhe Vendosjen e Ankesave, lidhur me pretendimin ankimor të ankuesit, analizoi provat e administruara dhe rrjedhimisht duke ju referuar dispozitave të Ligjit Nr.06/L-114 për Zyrtarët Publikë, konstatoi se nuk janë plotësuar kusht ligjore për anulimin e procedurës për lëvizje në kategori, sepse sipas shkresave të lëndës është konstatuar se procedura e lëvizjes në kategori për vendin e punës *Zyrtar Ligjor 1*, në Burgun e Sigurisë së Lartë është zhvilluar në pajtim me dispozitat e nenit 38 të Ligjit Nr.06/L-114 për Zyrtarët Publikë si dhe dispozitat e Rregullores (QRK) Nr.16/2020 për Pranimin dhe Karrierën në Shërbimin Civil të Republikës së Kosovës. Ndërsa Vendimi me numër të protokollit 1527 i datës 23.12.2021 përmes të cilit është anuluar procedura e rekrutimit me arsyetimin se organi i punësimit është në proces të hartimit të Rregullores për Organizimin e Brendshëm, nuk ka mbështetje ligjore sepse sipas shkresave të lëndës rezulton se Grupi Punues për hartimin e Rregullores për Organizimin e Brendshëm të Shërbimit Korrektues të Kosovës është themeluar me Vendimin me numër të protokollit 1145 të datës 07.10.2021 nga Zëvendësuesi i Drejtorit të Përgjithshëm të Shërbimit Korrektues të Kosovës, ndërsa një ditë më vonë, gjegjësisht me datë 08.10.2021 i njëjti organ ka aprovuar kërkesën për fillimin e procedurës për lëvizje brenda kategorisë për pozitën e punës *Zyrtar Ligjor 1*. Andaj Kolegji vlerëson se veprimet juridike të ndërmarra nga Zëvendësuesi i Drejtorit të Përgjithshëm nuk janë në harmoni me njëra tjetrën, sepse i njëjti ka qenë në dijeni lidhur me procesin e hartimit të rregullores për Organizimin e Brendshëm të Shërbimit Korrektues të Kosovës dhe përkundër kësaj ka aprovuar kërkesën për fillimin e procedurës së rekrutimit dhe si rezultat i këtij veprimi është bërë hapja e konkursit për lëvizje brenda kategorisë, me datë 11.11.2021. Për më tepër, organi i punësimit në arsyetimin e Vendimit me numër të protokollit 1527 të datës 23.12.2021, vetëm ka specifikuar se: *SHKK-ka publikuar konkurset e brendshme për lëvizje në detyrë për pozitat e lartcekura, meqenëse jeni në fazën e hartimit të rregullores për organizimin e brendshëm deri në miratimin e kësaj rregullore, konkurset e shpallura anulohen*, mirëpo nuk ka dhënë ndonjë arsyetim bindës lidhur me atë se me miratimin e kësaj rregullore do të ketë ndryshime lidhur me statusin e pozitës përkatëse të shpallura për lëvizje në kategori, ku si rrjedhojë ndryshimet e tilla do të ndikojnë edhe në këtë proces.

Andaj, bazuar në konstatimin si me lartë, dhe duke marr parasysh se veprimet procedurale lidhur me konkursin e shpallur me datë 11.11.2021, deri në ditën e anulimit, janë zhvilluar në pajtim me dispozitat e Ligjit Nr.06/L-114 për Zyrtarët Publikë si dhe dispozitat e Rregullores (QRK) Nr.16/2020 për Pranimin dhe Karrierën në Shërbimin Civil të Republikës së Kosovës, Kolegji në kuptim të dispozitave të nenit 52 paragrafi 1 nën paragrafi 1.4 dhe nenit 18 paragrafi 1 nën paragrafi 1.2 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, me qëllimin për të vendosur ligjshmërinë vendosi për anulimin e Vendimit me numër të protokollit 1527 të datës 23.12.2021. Rrjedhimisht obligohet Drejtori i Përgjithshëm i Shërbimit Korrektues të Kosovës, që t'i ndërmerret të gjitha veprimet e duhura procedurale për vazhdimin e procedurës së rekrutimit të shpallur me datë 11.11.2021, për vendin e punës *Zyrtar Ligjor 1*, me numër reference RN00007759, në pajtim me nenin 49 paragrafin 2 dhe 4 të Rregullores (QRK) Nr.16/2020 për Pranimin dhe Karrierën në Shërbimin Civil të Republikës së Kosovës.

Nga sa u tha me lartë e konform dispozitave të nenit 18 paragrafin 1 nën paragrafin 1.2 të Ligjit Nr.06/L-048 për Këshillin e Pavarur Mbiqyrës për Shërbimin Civil të Kosovës, Kolegji vendosi si në dispozitiv të këtij Vendimi.

Vendimi hyn në fuqi ditën e nënshkrimit nga Kryetari i Kolegjit.

**Këshillë juridike:** Kundër vendimit të Këshillit, pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në Gjykatën Themelore në Prishtinë-Departamenti për Çështje Administrative, brenda afatit prej tridhjetë (30) ditësh, nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.

## KËSHILLI I PAVARUR MBIQYRËS PËR SHËRBIMIN CIVIL TË KOSOVËS

Lënda me numër A.nr.08/2022

Valentina Kaçandolli Belkteshi

Procesmbajtëse

Jeton KOÇA

Kryetar i Kolegjit



Vendimi i dërgohet:

- Ankuesit
- Drejtorit të Përgjithshëm të Shërbimit Korrektues të Kosovës;
- Udhëheqësit të Burimeve Njerëzore në Shërbimin Korrektues të Kosovës; dhe
- Arkivit të KPMSHCK-së

